

小
匏
庵
詩
話

小匏庵詩話卷五

嘉興吳仰賢牧騶輯

洪稚存太史之遣戍出關也朝士多贈行之作以全椒吳山尊
學士一律爲最無一同護曲筆無一慰安套語竟似代太史自
爲供狀者過則歸己人臣立言之體宜然詩云散髮江湖興有
餘無端師友促登車竟忘太史無言責過恃愚忠類謗讐詔
許自新天子大奏非直道小臣疎烏頭馬角期真近記取聯
吟會合初起聯云云蓋太史已引疾歸里嘉慶四年正月聞
純廟升遐而赴都哭臨也及詔釋時京師方旱旋得甘雨
御製得雨敬述詩紀事有納言克己乃爲民請命之大端及將
原書裝潢成卷常置座右以作良規之註則又見帝德之大
而太史之不爲不遇也

元余忠宣闕合肥人字廷心通經術工分隸其學出於吳草廬學者稱爲青陽先生以元統元年進士歷官淮南宣慰使分守安慶以孤軍屢卻羣寇後陳友諒大會兵攻城乃血戰死城西清水塘其學問氣節洵爲有元第一流人物後人謁其祠墓莫不賦詩憑弔其佳者吾得二人焉一爲閬縣龔海峰太守景瀚一爲武進黃仲則二尹景仁龔作謹嚴黃作豪放各擅勝場龔謁余忠宣公墓云石人跳動黃河畔汝潁斬黃先作亂二十四郡無平原守臣望風如鼠竄誰歟健者忠宣公孤臣血戰波濤中江淮蔽障豈敢必尺寸亦以完吾忠情水塘邊公死處血化爲燐香入土墓門松栢風蕭蕭行人淚滴秋江雨同志惟聞秦與李元室科名數人耳皖城何似石頭城千載寧爲袁燦死太僕當年最有名可憐國史竟無成寺僧眞誤乃公事白髮興朝

聞履聲

黃作余忠宣祠云至正國步何倉皇將軍許國軀堂堂生爲孝
寬易易耳一死直是張睢陽妖星十丈橫軫翼兩淮東西已歸
賊龍舒重鎮實彈丸賊畏將軍至傾國裹創前後數十戰漸見
全城氣皆墨蜂屯蟻聚當平明巷戰殺賊揮短兵賊酋大呼宜
得生生當官汝付汝城將軍戰手指賊語死爲厲鬼當殺汝青
萍三尺水一泓去此一步無死所將軍已死殉合門紛紛部曲
呼其羣曰余將軍死死君我輩何忍孤將軍從而死者千餘人
此千人者驅可戰甯死相從不生叛生得死力死得心將軍才
大空古今用之乃副宣慰使國事拔猗可知矣斗大城猶守六
年百戰身經中三矢真人濠濮提劍來掃清六合浮雲開崇祠
遣祭議隆謚碧血靜掩蓬蒿堆靈風何事尙含愁應爲堦前老

臣素嗚呼元亡尙有人盡如將軍元可存嗚呼安得如將軍
秀水王仲瞿才氣橫絕一時精五雷法時川楚白蓮教匪作
亂其座主吳白華總憲省欽欲薦仲瞿可制邪教仲瞿以詩卻
之有六州生鐵鑄顏回句吳弗聽奏入上震怒褫吳職而令
仲瞿會試如故吳嘗館和珅家珅方赫赫仲瞿三上書於吳請
劾之可謂鐵中錚錚矣著有煙霞萬古樓集生平文勝於詩所
撰西楚霸王廟碑文竄東皋先生見之歎爲二千年來無此手
筆後改名良士號蠡舟晚寓揚州爲其子援例納微秩作祿養
計仲瞿自題楹聯云老子沒出息小兒未入流見者莫不絕倒
仲瞿下相詩云七十戰而霸八千人死之不聞亞父塚猶有憤
王祠按亞父自有塚在巢縣郭東吳淵穎集中有盜發亞父塚
詩盜雖發塚故在也詩人貪發議論信筆所至不復深考耳且

亞父與憤王分屬君臣一無塚一有祠以此相形亦屬無謂不若以敵人勝己者相形改爲不聞淮陰墓庶有氣勢又仲瞿有送趙介山殿撰奉使琉球詩中聯云外海山河唐屬國中朝天使宋王孫典切不浮突過唐人鸞掖鯉庭一聯

仲瞿繼室山陰金雲門女士名禮羸工繪界畫人物近劉松年趙大年仇實父諸家爲海內大宗陳雲伯題詩云山繞紅樓水繞門玉臺斑管寫黃昏建安七子圖還在此是金釵畫狀元以才婦而配才子洵是天生佳耦惜不永年不如趙管之饒艷福也著有秋紅丈室遺詩岳王墳云宗爺鼙鼓岳爺旗偌大西湖一壠低死後臣心如此水馱來君馬又成泥東京父老無須泣南宋興亡不足題難得杭州兒女好青春踏破兩條隄昔人以詞爲詩此乃以曲爲詩可云奇外出奇

上元梅伯元農部曾亮有贈仲瞿丈云早歲聲名寶劒篇論兵
談槩已年年三車作伴行千里一飯留賓破萬錢南國微詞聊
寄傲東山遠志已堪憐只今憔悴西湖上繞屋清谿二頃田仲
瞿里居之日少一二逸事皆得自傳聞讀此詩可想見豪宕之
概

杜石樵先生_揚爲余會試座主雲巢夫子之祖一門鼎盛且享
大年至咸豐己未閒始薨嘗視學浙江禮賢愛士藹然可親人
呼之爲杜外婆秩滿還京口占云誰家風月非閒美何處樓臺
不畫圖此去可能重到否退朝清夢滿西湖風韻極佳始知能
載福者以度勝也

黎二樵簡廣東順德人乾隆己酉拔貢生養病家居足未踰嶺
著有五百四峰堂詩鈔其詩翼翼獨造昌黎所謂橫空盤硬語

委帖力排羣庶幾近之洪稚存評其詩如怒蜺飲澗激電搜林
生平頗不滿新城戲作飲酒詩曰谷拙實競巧阮鮮乃趨俗又
寄黃仲則云吁惟百年來新城贗粃糠遂使竈下姬競爲時世
粧古體各詩劇目怵心奇橫恣肆今錄其與升父論詩一首乃
自道甘苦之言詩云造物者呈露各自有氣力文章之根源厥
至窺命脉廣以納諸有細以入一息神明絕欺妄詩言瀟精液
狂簡謬小儒愚賤坐大惑袁生爾何感使我露肝膈聲詩之於
人有甚奕秋奕無使心有鵠勿冀名生翼如將游名山且爲言
所歷士生古人後甯有不踐迹始則傍門戶終自墜檠戟稗校
轉渠帥揮叱赴巨敵一身數死生百戰資學識絕境無坦步高
唱有裂筍彎弓石爲肉磨刀水先赤萬仞虛我踵我射自正直
人方歸而哭我已游八極究其所歸理靜破萬物的要於其發

端真氣貫虹霓遇之在旦暮帛長不逃尺反身不能誠可任背負刺

同治癸酉夏同年陳少泉觀察攜其高祖雪園先生讀書吾廬圖屬題先生名作梅嘉善人乾隆壬戌進士由刑部主事官至雲南分巡迤西道圖爲富陽董文恪所繪圖中題咏皆老宿如黃昆圃少宰錢文端太傅皆康熙朝詞臣汪謹堂太宰周蘭坡學士陳星齋太僕商寶意太守林蒲封學士皆雍正朝詞臣曹地山宗伯爲乾隆元年進士齊次風少宗伯爲丙辰鴻博而壬戌同年如金兩叔姓鄭誠齋虎文王芥子太岳邵荀慈齋巖亦皆有聲翰苑閒其署款稱謂曰老先生者乃前輩呼後輩之通例遇同姓則曰家老先生不必其同館也今老先生之稱久不行而同館中前輩稱後輩曰館丈亦老先生之意諸老皆著作

名家墨妙可玩而詩不盡佳以牽率應酬故耳今錄莊鳳岐詩

云十年清望白雲司經術爭推漢不疑何事攤書學閒坐只今

刑措已多時披襟坐對萬蟬魚滿地清陰晝晏如笑煞燈前人

半臂未忘官樣宋尙書商寶意云先業猶存水竹居董公寫照

廿年餘曩在館中屬董尙書作樵風別館課子圖距今已二十餘年矣待成馬退山中記欲探

龍威洞裏書乞郡遠投荒徼外披圖重憶服官初公還未老吾

衰甚仕學兼優愧不如時先生分巡迤西商守順甯爲其僚屬

故款稱某某老大人命題商某呈稿執禮甚恭惟鄭誠齋宮贊

一詩有規勉而無讚揚如師之訓弟款署同年而不呼兄其殆

先生之丈人行歟詩云依然風味舊醺青漫指郎官認列星可

解致君須讀律由來用法貴通經逢人敢說優而學願爾毋忘

慎乃刑莫戀庭陰坐庭石飛蛾縲綬待平亭按馬退山在廣西

南甯府柳子厚有馬退山新亭記商詩指此

雪園先生孫皋蘭太史傳均嘉慶丁卯解元甲戌進士以庶常
改官部曹因前圖題咏已滿乞南海吳荷屋中丞榮光重摹成
卷英相國署其端題者首覃溪學士時在丙子年已八十四作
絕句三首書法蒼勁近俞蔭甫前輩題云乾嘉諸老輩翰墨尙
淋漓荷屋重摹稿蘇齋首賦詩自從經劫火幸未損裝池肥瘦
蘭亭本名山好護持余亦題三絕句云學道胸襟氣自華引經
折獄漢廷諗君看畫裏如田面不信刑官臉削瓜 名篇高唱
盡詞垣詩老風流贗墨痕恍聽當年供奉曲貞元朝士接開元
歸舟我亦自瀾滄劫後難尋舊草堂爲有十年書補讀移家
來住鄭公鄉曩在滇南有詠懷詩云無計改操三尺劍有心補
讀十年書同治乙丑回里已已遷居魏塘

江都李瘦仙天澂有句容野望云郊西草色半青蒼驛路蜿蜒
入建康早稻花香山雨霽老菱葉亂水風涼荒城似霧迷長薄
古塔如錐淡夕陽不解承仙村落裏行人猶爲弔南塘風景宛
然

會稽童二樹布衣鉦工畫梅兼善隸草有二樹山人詩稿其秋
日錢塘江觀晚潮云海門青逼漢江月白生潮一氣自開闔眾
星相動搖水犀爭地險天馬跳風驕莫作鴟夷看波平怒已消
雄壯稱題

石門方蘭坻薰善繪花草仁和奚鐵生岡善繪山水然兩人實
能互兼其技方隱於布衣奚亦辭孝廉方正之徵繪事外皆工
書好吟詠方著山靜居稿奚著冬心盦詩集有各題墨竹詩方
云山澤閒臞不知肉從事毛錐頭已秃硯池中有梅花泉一竿

兩竿寫蒼玉。纖風午夜搖空庭。明璫翠羽來湘靈。湘娥清怨入
瑤瑟。二十五絃聲泠泠。散入深宵不成夢。影上闌干舞青鳳。酒
醒香殘看未真。墨痕著處秋陰重。奚云蕭郎兩重吾未見。老可
干畝誰爲傳。平生食筭不計數。有時吐出胸中烟。涼堂汲水潑
清影。一一小鳳飛秋天。夢魂今夜落何處。滿篷明月行湘川。兩
詩皆氣清骨秀。不受塵氛。盡稿流傳。兵燹後愈珍。均爲有力者。
負去其聲價幾與國初四王埒。昔法梧門有奚鐵生畫山水。
歌云方薰旣死。岡第一浙中近來無此筆。恐被丹青損性靈。皴
染無須借顏色。蓋推重久矣。今則贗本充塞。鮮覩廬山眞面矣。
邵無恙初名颿。以字行。號夢餘。山陰人以孝廉官大令。著有蕉
雪齋鏡西閣集。阮文達稱爲吳澹川之勁敵。如次栢井驛云。已
失關前路。猶看嶺上霞。青山爭送客。寒食獵辭家。匹馬逢秋月。

孤村落晚花出門無遠近分手卽天涯一氣貫注格律渾成他
如水門沈夜月山路上秋河大江殘夜生新水微雨扁舟夢故
人夢回雨雪迷梁苑頭白江湖望 裕陵等聯皆非浮響

高文良公配蔡夫人貫通經史詩筆雄健能爲文良公代草奏
疏威信公岳勤襄大將軍其配高夫人嫺弓馬善理軍政亦能
詩常與公倡和公於雍正十一年被逮刑部部議失悞軍機之
罪八有寸斬不足盡辜擢髮難數其罪等語坐斬立決議上蒙
恩改監候 純廟立乃釋歸故公悼亡云全家幸得歸田里
相守翻成永別離又云從今永擱闔中筆自此無人解和詩蓋
紀實也

乾隆朝西陲能詩者以狄道吳松厓鎮爲最嘗從牛真谷震運
游真谷詩得派於北地北地爲松厓鄉先輩然松厓轉益多師

不拘一格。公安雜詠云：勿薄公安派。三袁已到家。謁何大復祠。云：藐姑冰雪在。塵糝愧儂詩。讀此知其所取益廣矣。隨園詩話所錄，但取其才情耳。吳蟻園紹詩謂：松厓律不如古詩。古詩不如樂府。良然。如任孝子歌云：渭源任四報死父，持一鳥鎗殺百虎。阿干歌云：阿干西我心悲，阿干欲歸馬不歸。爲我謂馬何太苦。我阿干爲阿干西，阿干身苦寒，辭我大棘住。白蘭我見落日不見阿干，嗟嗟人生能有幾。阿干此歌補慕容廆思其兄吐谷渾而作阿干華言兄也。此二首深得古樂府神理而不襲其貌。松厓有題高青邱梅詩後云：雪滿山中高士臥，梅花典故美成知。竹垞但說吟松好，忘卻香篝素被詞。自注：周美成詠梅詞更可惜。雪中高士香篝，素被正用其意。朱竹垞乃謂此句似松不似梅，悞矣。

張桐固觀察。謫甘肅武威人。乾隆己丑進士官湖北荊宜施道。有念初堂詩鈔。吳賓漁序之。泊歸州云。危檣轉山角。烟火是歸州。行郡幾時到。因人復此游。江湖淹客老。風雪逼春愁。寂寞寒城近。孤吟看敝裘。詩格蒼老。他如過荊門州云。瘦馬帶殘雪。荊門孤客行。嘉峪關云。白日沉沙遠。黃雲蓋樹低。皆近杜律。

高要莫善齋廣文元伯著有柏香書屋詩鈔。其佳句如涼風柳下來。麥氣與之清。殘雨留晴樹。涼雲斷曙河。老知讀書趣。貧切教兒心。詩成得意忘。爲客天與閒。身豈必官客。身似鳥方投。樹秋夢如雲半在山。諸聯爲嘉善黃霽青太守香山黃香石校錄。所愛賞。余尤服其詠古。諸作獨出手眼。如項伯云。已解鴻門兵。復下廣武俎。季父有言無不從。一時意氣忘漢楚。匆匆東城廿八騎。不聞季父說劉季。千金購得項王頭。一時諸項俱封侯。親

家季父賜姓劉漢文帝云此日藏書律已開殘篇零落未全同
一時治術崇清淨千古遺經付劫灰問鬼膝前曾半夜望仙河
上有高臺如何申固垂垂老始見蒲輪東錦來一譏項伯之背
主事敵一責漢文溺於黃老仙鬼之說未能汲汲表章六經詩
中具董狐之筆

順德胡同謙亦常一號豸浦爲槐園太史子從紀曉嵐戴東原
諸先生游學日益進乾隆辛卯魁於鄉卒年卅一有賜書樓詩
草錢竹汀稱其妙悟天成古體尤勝踏車曲云歷歷鹿水入
車腹不往則復解一海遠於岸中閒轉灌水上天半一半人汗解二
長腰環環足爾車翻暮滿朝乾解三龜坼呀開草死飛灰誰省災
大吏回催租誰縣吏來解四節短韻長得古樂府之遺
昔人謂杜少陵母名海棠故西川海棠最盛未嘗入詠婺源王

晉亭佩蘭有海棠花下感慟詩蓋傷失怙而作運事無痕遂成
絕唱詩云春盡海棠三兩枝自來工部廢吟詩無邊青草何由
羨幾樹白楊知對誰正憶王裒流涕日恰當東哲補亡時家家
寒食吞聲在腸斷春山有路歧晉亭一號錦汀以選貢官蘇州
府學訓導著松翠小菟裘詩集法梧門祭酒序之多清新之作
五言如行藏千慮短貧賤一身多孤雲抱野性老菊識秋心七
言如路迴坐閣憐鶯滑水近行廚斫鱸肥難酬閨思一千里怕
讀家書十五行

前後鴻博諸老凡徵而未與試試而未取用者備載鶴徵錄中
雖以顧甯人先生邵薦免徵亦繫之雜綴然尙有兩人宜掛齒
頰者在己未曰李中素字鵠山又字子鵠湖北黃安人初客單
父爲詩十律易名李載贈客爲余中丞及龔宗伯王宮詹所賞

中丞時官諫垣每鄉人來輒問知李載否皆無以應會 詔舉
鴻博余公欲以其人薦而不知李載卽李中素苦索蹤跡不得
疏已繕復止爲遲遲兩月甫上而鄉人復有見余公者具悉前
事乃大歎憾中素後謁余公於吳門執弟子禮並獻感遇詩云
投老猶爲躑躅行數奇終愧動公卿同時幸問相如賦異地終
疑范叔名千里長嘶勞剪拂十年一拜見平生移情只合游天
海從此休彈別鶴聲

在丙辰曰汪後來字白岸一字鹿岡廣東番禺人康熙壬午武
舉人會試被放有黃軍門者一見薦之授宣武將軍參軍事旋
以母老歸養雍正乙卯鄂大司馬以鴻博薦託病堅不出時年
已逾六十矣詩學韓孟兼工書畫日南諸國主亦航海致幣索
之其示隊長溫勳詩云庭筠苗裔不凡材累日愁腸向爾開肯

以衛官卑屈。宋且爲蓮社擬宗雷。長貧豈得羞矛戟。歸夢相將到草萊。夜半詩成攜稿入。營門驚道羽書來。想溫亦能橫槊賦詩者。可謂將軍不好武矣。方之前代。應與陳第比蹤。其卻薦也。殆知引嫌卑牧者歟。

仁和趙鹿泉總憲佑以制義顯。詩不甚工。然有過分宜縣作二絕。拾其軼事足廣見聞。其一云舟行人指鈴岡嶺。相國當年此結廬。贏得長橋亘烟水。不知所讀竟何書。自註城外萬歲橋卽嵩所建。相傳嵩以翰林讀書鈴山堂。十年常病津渡之煩。又羨蘇州萬年橋工之勝。大拜後奪其石遷築於此。邑人猶以其事及免漕賦事德嵩。禁勿言嵩過優。人不敢於郡演鳴鳳劇。其二云椒山故宅至今新。千古賢奸兩不泯。一曲滿江紅被奪。可憐公道付愚民。自註晉杭西湖岳祠碑刻滿江紅詞。乃嵩作也。字

畫俱卓爲鄉人競擊其名太守某恐石壤因改刊夏言乃已言
亦嵩之流以被嵩殺增重耳嗟乎以嵩之貪刻尙知私其故里
今有忝附搢紳而魚肉鄉里者直爲嚴嵩所不爲可勝喟耶
華亭黃石牧太史之傳著有集唐香屑集膾炙藝林當與朱竹
垞蕃錦集詞並傳矣顧其自製唐堂集詩則又魁奇雄悍間有
失之生硬少含蓄處卻一洗旖旎之習才人筆墨其不可測如
是今錄其近體如樟樹鎮阻風云長途難定日始信計程非順
水風相妬思鄉天與違泊船無一事閒坐到斜暉唯見章江惡
濤如白鷺飛又冬暖云雖嫌違月令頗喜活窮民夏日云枯蘚
沿陰活晴泥過雨香卽事云莫謂安流易黃金鑄此隄言河防費帑也
病中云家書姑妄語依舊寫平安自羅源至福甯道中云雲氣
千山暝灘聲六月秋

海鹽張芑堂徵君昌燕嗜古成癖蓄金石契一帙攷據最精海上故多古甌嘗得一磚側有徐君二言筆法類漢人碑額蓋墓甌也徵君製爲硯乞嘉定錢竹汀少詹作銘銘曰非瓦非石亦圭亦璧彼端者紫不若徐公之美銘詞典切巧不傷雅胡焯紀以詩云譬彼文士無重名藉口有力身乃顯元康寶鼎未爲奇銅雀香姜應不滅從知二公力量大戲弄小物成圭璩武康徐雪廬熊飛亦有詩武康縣置自東漢在六朝爲前溪歌舞勝地文物最盛中有古墓雪廬嘗得徐詳墓磚於烟霞塢有太康元年九月徐氏作凡九字材質恂暴不及是甌詩有云我甌薛暴浮青苔君磚堅栗紅玫瑰晴窗拂拭鬪邢尹上駟那得齊中材蓋紀實也薛音電破裂也考工記陶人凡陶旒之事髣髴薛暴不入市

和珅伏誅在嘉慶四年己未正月青田端木鶴田中翰有紀事
詩三首云嚴重亮陰地權臣付法宮白衣驚殿上黃鉞出闕中
上相關深計高皇識苦衷古來爲社稷不待寢陵終其額駙
容不死安然錮禁林非私公主意只念上皇心爵絕還通籍
家亡再賜金老奴地下泣恩罪兩難任其既清端拱地全不治
私人寬典緣仁主明恩召直臣臺章三殿肅史筆一朝新太
息天宵後吾皇政始親又有臣家四首則專刺和珅以垂炯
戒者也詩云萬歲漢皇壽臣家富貴齊銅盤愁拆掌金塢怕燃
臍虎背身曾悞龍髯夢已迷分明有一日望斷玉竿難其御史
臺無響彈章落九重鏡中頭已失上諭有對獄上口何容故事
牽黃犬妖言應白龍廿年爐火著漏盡一聲鐘其籍沒唐元載
風光安在哉黃金成笑柄紅粉化愁臺玉馬倉茫逝銀駝寂寞

同人間無一慟憐色不憐才其第宅秋風散今誰石季倫市樓
珠玉賤歌館綺羅貧寤夢荒三月繁華殿一身古來恩倖傳頭
白是何人其四妖言句當時術者有白龍之言人謂賜帛之兆又
珎有妾吳氏賦詩投繯死珎獄中詩有懷才悞此身句第三首
蓋指此

鬪蟋蟀之戲自壑相筭經而後盛行浙西蠻觸相爭沙蟲小劫

亦消秋雅劇也吾邑汪秋白上舍大經曾與翁石瓠用韓孟鬪

雞韻作鬪蟋蟀聯句云候蛩感秋生大經狎客聚族待居壁善養

銳翁春以下人各二句同登壇競博彩石產體乃剛輦化病則殆辨名陸

疏詳品類賈經在雌伏斂丁斧雄遇張甲鏃紛紛列廣場各各

踞高壇圭竇權頻頻丸泥封磊磊朝翦夕始食有約無肯改圓

睽雙睛青堅奮兩牙瞋聲先偶一鳴氣特增十培六跪助相搏

一心甘就醢深喜獨勝勇竊耻交綬餒拱立持且僵倏竄遁非
給急追贖鹵申暗擊鄙逢亥碎首眞何辜強項竟加罪裂齒腦
髓迸傷股血腥浼用酬一飯恩重託千金賄環睹屹成林喧呼
沸翻海剋期再礪能計日中休怠策勳爾徒爲丕績孰嘉乃藏
之盆三花裏以囊五綵賈餘常矜豪迎歸捷報凱罷豈秦貶恬
榮若燕拜隗流風狃吳俗游戲怪宋宰庶幾良士篇足爲稗官
采阮文達視學兩浙時曾以此題課士中多警篇

自退之有石鼎鬪雞聯句等作後人效之鬪險出奇不遺餘力
亦可各見才情嶺南譚康侯與黃香石有寄居蟲聯句卅二韻
賦物寫狀儷事極工按寄居蟲卽江賦所云蠨蛸螺軀而蟹足
鰕鬚而蝸目附殼而處其質瑩潔如玉產南海有時販運至禾
余嘗購數枚蓄之秋深離殼而出旋僵矣詩曰具體得蝥蚱有

聲同郭索生物息相吹他族實此僞蜚肩負蜃趨月腹蝨蟻蝕
舞甕雞自雄戴山鰲有力乘蜾蠃死渠自蠶奔有鬲疑彼作鯨
吞竟茲薦蠶食叢爾稱寓公闢然得荒宅得非扶餘王突據虬
髯客負嵎竟類虎此客定能賊臧武仲以防孫林父入戚置人
復壁間甯甯卧楊側又曰鵲巢鳩維居蟹匡蠶則績縱非生俱
生要自適其適殊塗本同歸相視久莫逆又曰寤言安樂窩適
彼清涼國自惟愛吾廬豈曰爲物役前數聯徵實非儉腹所能
後數聯善談名理

江右吳蘭雪嵩梁在乾嘉時詩名頗盛中外達官能詩者咸與
締交故香蘇齋集中酬應之作居多當時都下指其集爲有韻
摺紳錄甚至譙飲時借以行觴政其法各人隨手緝取一頁勘
其題目中有戴珊瑚頂者飲一杯竟有連沃至醉者可謂虐謔

矣顧余未覩全集同治甲子春適貴陽值黔中久亂無人購求
書籍佩文韻府價祇十金客無顧問者以其艱於馱載耳獨香
蘇集板藏彼中都人士奉爲金科玉律索值甚昂因向陸澹吾
學使處假得一部攜至成都讀之覺首首動目及掩卷思之又
不能指何首爲佳吳門顧幼耕復初謂余曰蘭雪之詩詩中之
墨卷也余急許爲知言夫墨卷之佳者未嘗不問津前哲特修
飾面目肉勝於骨耳近閱張南山詩話亦於蘭雪多不滿之詞
余謂有正味齋古今體詩亦然不如試帖詩之獨出冠時也
郡縣中治文書者惟老吏爲能舞弊者亦惟老吏爲甚求其文
無害也難矣然居官者苟留心體察若輩中亦有斷斷自好者
張鶴舫有悼老吏謝自然詩云病喘猶趨拜深憐此八年才無
訶譏及老柰簿書纏氣味元儒士清貧祇月錢惟將香案吏祝

汝後身緣鶴舫名環英江西永豐人嘉慶辛酉進士令天長改
饒州府教授其人必廉靜寡欲者宜其與此吏氣味相投也
桐鄉程春廬同文嘉慶己未進士官奉天府府丞著密齋詩鈔
有淮陰懷古一篇立論謂高祖欲易太子所忌呂后呂后之黨
樊噲最悍計惟淮陰足以制之故改封爲侯將留以輔趙王無
殺意也自呂后乘帝出征給信入朝斬之自是呂氏無所忌不
待四皓羽翼而太子已不可易矣見解頗創起聯云五十年間
兩呂氏雄者祖龍雌者雉奇橫之至

嘉應宋芷灣觀察湘宦滇十三載所在多惠政公餘汲引士類
不倦永昌郡塑生像祀之至今滇人謳歌不置尤珍藏其翰墨
公喜豪吟篇什甚富嘗自評其詩曰哀樂無端飛行絕迹可謂
不誣有李將軍詩挽忠毅公長庚勦海賊蔡牽而歿也英氣鬱

勃字字飛鳴詩云入海斬蛟登山射虎壯士出門寸心報主生也臣不敢知死也臣不敢辭臣知殺賊而已焉知生歸與死歸汝賊蔡牽汝何么麼海水四晏無風鼓波汝賊蔡牽汝何多狗信信血人千里牙口汝賊蔡牽我來將軍將軍飛來汝聞不聞汝賊蔡牽汝何不艤上天入地將軍殺我汝賊蔡牽汝何不弓出日入月將軍如風汝賊蔡牽汝何不死罪大海小將軍守此迷迷離離將軍之旗歌歌舞舞將軍之鼓將軍曰刀蒼天晝高將軍曰矢怒潮夜死吁嗟乎臣不滅賊臣甘死賊臣且滅賊臣竟死賊海水無情天風盡墨臣北面稽首謝天子聖德天子無悼臣臣死臣之職大海蕩蕩天所圍雲車風馬神靈來上帝許我梟厥魁明年蔡牽死戰士休徘徊龍宮開靈風回詩出至性恆能突過前人如劉芙初別母詩云兒身尙在門母

心已千里較倚門倚閭語尤酸楚宋正鸞詩曰不如墳頭草猶得與親依較寸草春暉語尤沈痛

歸安姚文僖宗法宋儒居官清慎乃其詩有曰簾淨小童晨薙草枕香侍女夜藏花抑何綺麗

嘉善黃退菴先生凱鈞霽青太守之父也詩近南宋楊陸不事雕琢如故人詩好久能記自種花開倍可憐老境漸來先齒髮此心自問尙兒童語雖淺頗能入人肝脾

重游泮宮詩古今來作者尙少如王光祿鳴盛錢詹事大昕王侍郎昶秦侍郎瀛其最著者竹汀自賦云三不朽間當立腳四先生往孰差肩其自負處初不以小喜爲慰而青浦趙汝霖送述菴重游泮宮云林下逍遙近十年鑑湖一曲主恩偏若教從此登雲路及第還居梁灝先則又以詼諧而見其善頌也

南方竹筍之美味甲諸蔬惟北地之白菜足與抗行二者皆尤
物土人以常蔬視之易地而始珍臨海洪載厚孝廉坤煊有食
菜作云我行來京師不了藜藿債夙聞白菜佳飽食淩葱薤離
離露下葵濯濯莧陸夬寒威日欺壓霜雪不可殺初爲龍頭縮
稍退鵝黃曬冰肌傲姑射玉骨挺衛玠椒鹽沸初下齋飯學禪
派濃甘愜軟美清氣漱沆瀣勢侔玉版翁坐割燕吳界丰標兩
不讓夷惠各和介蜀中有名蓮花白者其味尤勝蜀本饒筍而
秋菰又復擅奇熊魚可兼何其得天獨厚耶余詩所謂抱美不
乞助雞豚皆無功是也

七律中橫插硬語最不易工曾記得兩聯皆係游山寫景王仲
則云草閒得路至絕壁天半有風吹客衣郭頻迦云直以一身
穿萬竹忽然四面立羣山

江都秦敦甫恩復乾隆丁未進士官翰林院編修精校勘延顧
千里於家共相商榷多搜古本刊之號爲秦板後半燬於火著
有石硯齋集其西湖雜咏云細穀波紋打槳輕嫩涼天氣雨兼
晴閒將錢趁袁韶酒更覓魚羹宋嫂羹按宋嫂魚羹事屬習見
袁韶酒則有未盡知者隱居通議載嘉定間袁韶以戶部尙書
知臨安府大榷酒利雖湖上三賢堂亦令賣酒有題詩於壁者
曰和靖東坡白樂天幾年冷落在湖邊如今往事都休問且爲
袁韶辦酒錢韶聞而媿之韶蓋史彌遠之黨聚歛臣也

吳江趙藥亭明經基有讀壯悔堂集詩云公子聲華滿大梁南
都事去儘蒼涼文章知不饒班固黨錮何曾殺范滂故國烽烟
悲玉馬世家弓劒閱滄桑甯南氣壓參軍府午夜論兵甲帳霜
八句中包括朝宗一生事蹟字字諦當氣足神完

孫淵如觀察星衍其配王恭人采薇才慧早世觀察有揚州集
方立堂齋中同汪劍潭全晚芳諸君作云黃菊清樽夜漏微貧
交相聚尙依稀何能奉倩生猶樂只認秦嘉客未歸紅燭照顏
年少去碧山回首昔游非多因添作他時恨小雨泥深夢欵扉
此殆悼亡後作情見乎詞

婺源胡承煥字奎若號雪蕉乾隆丁未進士官主事著龍尾山
房詩存史閣部墓云冰霜透甲淚痕乾辛苦揚州僅一韓閩外
將軍皆豎子後庭狎客半高官謝安出鎮功誰紀陸抗防關事
已難宰相心腸真鐵石梅花深處葬衣冠一收得推陳出新之
法

廣西歸順州漢屬交趾郡明始設州號稱難治乾嘉間有高密
李少鶴憲喬曾任此州呈鎮安太守詩云民頑不知恩不仁哉

此語爲恩知有幾爲害已莫數此州屬極邊夷民紛雜處舊以悍獷聞未往神先沮試爲布腹心告其兄與父興利固有待先除昔所蠹庶各安爾業訟獄莫予苦此來未云久民已三泣予某實心愧之而證所聞誤勤勤賢太守怨吏不怨民某旣證所信還舉以相聞興利兩句爲治縣要言蓋興利非久任不能害則隨時可除無害卽是利耳若民頑之說尤有辨邊鄙之地民魯而直受虐不甘隱忍非頑也迨激成事變力不能制姑事彌縫於是官威替而民始頑矣當如武侯治蜀先戢其驕縱法立而知恩民亦相安如故此詩皆藹然循吏之言句法則學昌黎又有貧士詠秋草難爲青貧士難爲形淚落不入土化爲寒井冰寒冰塞天地破屋風騷騷一夕不餓死氣與衡岳高此又近

東野

陶仲冕字六枳號陶山湖南善化人乾隆癸丑進士官至陝西
布政使性孝友自以其父官平陰貧甚母卒不能歸葬遂葬於
肥城縣故陶山之麓因號陶山始宰荆溪以大買書通其帑其
後改官五六處輒以書俱著陶山詩錄咏灞橋有歇後自嗤新
宰相呵前那識故將軍一聯巧不入纖其他佳句如縱有焚黃
禮終非戲綵心小溪羣鴨喜高樹一蟬涼暮景催疲馬春風起
倦禽得便舟車兼訪古無多簿領輒論文容易變寒秋後熱最
難忍淚老來朋皆可摘誦

錢塘陳雲伯大令文述嘉慶庚申舉人早年以賦仿宋畫院式
團扇詩及招勇將軍寶弓歌受知於阮文達著有頤道堂集出
入溫李晚乃斂華就實如哭徐心如河帥云莽莽河流萬馬奔
茫茫落日與招魂畢生功過歸輿論末路升沈戴國恩自有

勤勞酬野祭。祗餘涕淚灑師門。緣知未了平生志。暮雨靈旗海
氣昏。

陽湖陸季木大令繼輅有鐵舟上人畫松歌云。鐵舟上人真大
雄。爲我放臆。畫古松紙橫五尺縱二丈一。翰直立於其中。我聞
畫松如畫龍。鱗角隱見窺無蹤。豈知正坐臆怯耳。獨以全力圖
全龍。虛堂獵獵吹朔風。菩我忽在徂徠峯。蒼藤盤屈類鐵鎖。防
汝飛去青天空。上手扶七尺筇。入山一步雲一重。松乎遣汝
作梁棟。慮汝斲小難爲功。丞相祠前賦古栢。中郎爨下驚焦桐。
一日摩挲三歎息。我能知畫兼知松。讀其詩如見其畫。亦以全
力爲之者。

臨川樂蓮裳孝廉鈞有青芝山館詩文集與東鄉吳蘭雪齊名
其論詩云。吟哦鋪典實。無乃類談數。又云。理障與情魔。貞淫兩

失之觀其所棄知其所取矣有惠州白鶴峯蘇文忠故居詩最
爲沈着詩云莽莽乾坤萬里秋先生住處我來游江山盡到詩
人眼雲海曾回逐客頭富貴在君猶是夢神仙無命亦多愁青
山一髮中原遠更向儋州望惠州

小匏菴詩話卷六

嘉興吳仰賢牧騶輯

錢唐陳曼生鴻壽字子恭嘉慶辛酉拔貢官南河海防同知工詩善畫書法瘦硬有晉唐人筆意尤工分書今人家所藏曼生手跡凡險怪者皆質作欺人耳又嘗以意製宜興砂壺時稱曼生壺聲價足繼時大彬詩亦倜儻著有種榆僊館詩集湖樓夜集云風水搏不起悄然雙白鷗流雲過高樹銜月上層樓落葉遙山夢鳴榔隔浦秋胡爲殢游興閒繫木蘭舟

顧南雅通副純字希翰一字吳羹長洲人嘉慶壬戌進士官通政司副使以上疏請留松湘浦總憲部議革職蒙恩降補編修嘗督學滇南成就人材甚盛平生善畫工詩字學歐陽率更覃谿學士一見卽謂其詩字俱有骨爲之不已可以傳世使人

傳語勉之至今南雅字畫人甚珍之詩不多作隨手棄去故流傳者少咏秋樹云孤幹貞心迥出塵不隨凡木其沉淪還期鸞鶴重留跡無奈風霜老此身大厦於今望梁棟空山到處有荆榛漢家大將思馮異不爲江潭淚滿巾自注時阿文成公初薨托物起興寄慨無窮余集杜句題先生詩集曰卽今耆舊無新語尙憶先皇容直臣蓋指留松總憲被議事也

蕭山高穎樓第不羈才也幼善病稍長工詩古文詞兼善書畫制義汪洋恣肆連不得志於有司遂絕意進取繼配仁和孫荅玉女史蓀意才媛也秦徐贈札趙管揮毫極閨房樂事編其詩爲額粉盒集而女史亦有貽硯齋詩稿洪稚存先生賦贈云把臂眞憐識面遲廿年三過習家池重經萬七千餘里始讀高三十五詩青筇綠莎追往事金童玉女豔當時中郎亭外重陽好

四面雲山酒一卮金童玉女者明祁忠烈公夫婦能詩里中有
此目曩見所刻穎樓制義并以西堂老子四六序蓋假亂筆爲
之字皆古文不可驟讀好奇極矣而詩則清華豪宕絕不騁奇
如題小石上人半畝居云丈室蕭閒地欣來戶不扃水搖簷際
白山插畫中青茶熟留公案詩清寫性靈悠然羣會寂屋角颭
風鈴七言如一歲訪僧如隔世萬山圍佛盡低頭南船北馬胸
中淚萬水千山筆底春紅粉青山花外路綠波春水鏡中船西
冷感舊云君已落花歸此土我猶飛絮泥斜陽落花云金谷園
荒人去後元都觀廢客來時已成杜牧三生恨猶作徐妃半面
粧皆流麗可愛女史詩則洪太史最賞流水杳然去亂山相向
愁一聯而陳桂堂所取魚穿新藻出蜂抱落花飛一聯亦其次
也

戚餘齋明經芸生錢星梧侍御之舅氏也由德清徙居嘉興角里街受詩教於穉石宗伯著賜硯齋詩集八卷宋梓廬先生服其病中句云百年終有死四海況無醫以爲雖山谷無以過七律如朱翁子墓云市口招提近在鄰一坏松下記來頻公能留塚三千載我亦行年五十人太守祇教諛印綬故妻何怪愧樵薪饒他述徧還鄉樂史筆蘭台自有真詠某弁姬人入道云娉婷待嫁惜芳齡碧玉甯教賦小星越女可憐天下白燕兒只愛海東青明珠寶馬豪何有錦帳羔羊醉不醒太息紅顏甘命薄空門自懺洗心經其他佳句如竹籬尤也吠花塢燕子飛野店烏程酒春山杜宇花屋低茅代瓦岬斷樹爲橋雲客邨屋白日氣海山黃天開大圓鏡人坐小方壺過橋水鳥窺魚立繞楫野荷吹酒香亂塚禽呼車載板荒池草蔓馬兜鈴髡柳一江披老

綠醉楓十里點新紅。笑鍊生畫墨梅云暗香。疑有月將去。清氣定從詩得來。

嘉道閒無錫韻香。尼獄蓮號玉井道人。又號清微道人。善畫蘭石字仿蘭亭十三跋。皆秀挺有骨。無閨閣柔媚態。與諸名流聯吟狎。飲名噪一時。蓋今之魚元機也。倪濂舫方伯有題其畫蘭便面云。懺盡凡心。謝玉臺蘭。因無地證仙才。珍珠小字。綢繆印。都是禪天劫。後灰才爲情累深。致惜焉。

清遠峽飛來寺爲粵東名勝寺址。初自蕭梁歷代詩人屐齒所到。題詠甚富。詳峽山志。近欽縣何數峯大令青嘗攝篆清遠。手輯吾朝國初以來至嘉慶年凡名公鉅卿騷人墨客留題之詩彙爲兩卷。梓之各體俱備。大抵皆山水致語。參以禪宗閱之。幾有目迷五色之眩。及讀至秦小峴方伯作不覺心許。首肯詩

云曾聞飛來寺而我亦飛來峽束一江水泉喧萬壑雷獨循蘿
磴上突見松門開石壁孤亭表惟聞猿鳥哀飛來之名甚誕信
之固歎闢之亦腐此詩以而我亦飛來五字作現身指點靈心
慧舌恰合禪鋒

嘉慶初吳江郭頻伽先生僑寓魏塘與黃退菴父子暨同里詩
人樽酒過從極一時唱酬之樂有銷夏三會詩付梓第一集題
爲夏日田園禪興退菴云午後微微雲氣生山翁跂腳夢初成
兒童戲掬盆池水灑向芭蕉誑雨聲頻伽云栗里偏多惡少年
傳聞閭井正騷然此邦已覺人情好只向田翁借水錢時農人
被水者
以枯棒引水入河就
主家借錢曰水錢汪芝亭繼熊云青裙椎髻陌頭行挈榼提
漿餉耦耕歎息殘機猶未了籬邊絡緯已先鳴黃子未云昨宵
一雨減炎蒸詩酒商量會友朋竹下茆堂新結得免教借屋就

山僧第二集爲夏日游仙詩退菴云懶騎白鳳度層霄愛坐紅蓮當小舫火棗不宜銷暑會海山深處摘冰桃頻伽云夜明簾手曲瓊鉤蜜色通犀押兩頭偶墮亂螢三四點不知下界有星流郭丹叔云點筆能偷造化功銀河水與墨池通月中自寫山河影圓扇人間畫不工芝亭云宵來濯足到明河朝向扶桑洗髮過忽見羣真好儀仗笑他天上熱官多第三集題爲夏日閨中詞退菴云小姑十四太憨生手製紗籠一盞青愛向新涼閒院落泥他小婢撲流螢頻伽云羅繡空庭日影移閒愁不遣侍兒知水晶簾底支頤坐獨看荷花夜合時丹叔云簾鉤未下月侵床睡鴨金爐尙有香笑滅銀缸向郎問今宵涼是昨宵涼子未云十五娉婷不識愁學梳新髻帶嬌羞阿嬾生恐晶簪滑親替銀絲繫兩頭

黃愷錦號楠蔭嘉善諸生退菴先生之兄也有書耕堂詩集大抵循聲定墨步趨漁洋而五言尤勝摘其雋句古體如濛濛夕照中人烟古原樹新年寒尚在殘雪封高松近體如夕陽林際寺黃葉水邊邨涼生人意健雨霽鳥聲歡春濃花欲語風到竹先知數聯取徑澹遠皆可誦也

紀大復號半樵世居上海之閔行鎮工書法篆刻善山水分書瘦勁迥麗足繼谷口制行耿介不事上交故窮老荒江人無知者亦好吟咏詩不盡可傳而自饒逸趣有和姚鵬珊詠老境諸律摘其佳句可佐軒渠如長眉云百無一善可爭長眉也垂垂不肯揚健忘云讀未見書難一得聯將成句忽全無手戢云擎杯潑若滔天勢握筆搖成垂露書

尤西堂先生明史樂府以別調孤行雋快可喜其體近楊鐵崖

嘉道間陽城張雋三晉有續擬明史樂府凡西堂已作者不更
作湘潭周石芳尙書系英稱其與西涯爭席直勝西堂余最喜
女土司咏秦良玉一篇收云左甯南非健兒名字偶合真堪嗤
雄不飛雌不伏彼良玉此良玉天然尋一陪客來作調侃筆力
殊奇肆

嘉慶十八年癸酉林清之變滑縣令強忠烈公首擒牛李二逆
阻賊外援功烈甚偉名在史寇然李文成先在縣之老岸鎮鼓
鑄兵器逆謀大露巡檢陝人劉斌訶知之縛以送縣旋與忠烈
公同被害今人皆知忠烈名而不知有劉巡檢雋三作劉巡檢
行紀其事有身壓百僚底智出千夫羣句洵足發潛閭幽
常熟張信甫爾旦字眉叔工倚聲著種玉堂稿送仲兄爾福之
浙云春到異鄉花滿眼酒醒今夜月隨船春日感興云失意可

堪重對酒工愁無奈。又憑欄聞鶯云花中好夢曾年少。樓上春
人又酒醒芳樹動紅香漠漠。東風搖絮晝冥冥。報罷云閉戶妻
孥同短氣。誤人文字到中年。諸聯格不甚高而纏綿悱惻言下
皆有淒然之音。然集中亦有豪放自喜者。如雷雨云。一雨奪晨
成。黑夜萬龍捲海上。青天又讀劉蕡傳云。得來身後千秋易爭
到人間。一第難落葉云。已落料無重起日。先凋緣在最高枝。皆
饒有寄託。

程春海侍郎恩澤學問淹博。作詩好運僻典。咏雪云。此地已戕
旁不肯。我師猶守折漫羅。驟閱之不解作何語。按旁不肯害稼
蟲也。見沈括夢溪筆談。折漫羅卽天山一名雪山。見唐書地理
志。詩意不過言大雪可殺蝗蝻。時用師西部尙未凱旋耳。而用
典僻澀至此。好奇之過也。

同邑張叔未先生廷濟嘉慶戊午科解元兩上春官不第遂絕意進取性耽金石嘗得古甌入顏其齋曰八甌精舍所居爲新行鎮在圖經曰新谿先生易行爲簞說文簞竹田也故自稱曰竹田里叟長身鶴立眉間白毫垂寸許儀徵相國書眉壽字貽之晚又自號眉壽老人子慶榮復領道光丙午科解元先後相距四十九年先生及身親見大江南北述爲美談書法宗魯公優入南宮之室尤工八分人持金石書畫質實求跋志者屢滿戶外得其隻字珍同拱璧一時仰之如魯靈光云年八十一卒自刪存其詩八卷曰順安詩草集中多摩抄故物搜討舊聞之作考證詳明足備不中掌故同里王芑亭茂才嘗以構李餉周末菴廣文廣文爲作報玖圖先生題其冊端曰報構李也題詩曰這暑偏宜小暑天吟朋一路寺門前圖名題字都新樣左傳

翻將作鄭箋可爲藝林佳話

仁和錢東生學士林嘉慶戊辰進士詩宗樊榭有明熹宗小鐵
斧歌推波助瀾直括天啟一朝實錄詩云賓州黑金三寸長非
燕匕首非干將是誰燒炭百回鑄意取愜當藏鋒鋌老蛟垂涎
觸手膩烏雲半壓藍髻灑鞞頭液液鵲鳩斑鑿出春坊一行字
此物傳聞天啟年幸入秘府誇封纏宮門禁牌那足擬宣德香
爐不直錢木經却陳御榻上般輸削剜森相向前皇自號總兵
官今聖寶兼將作匠當頭獨坐委鬼公助者滿地茄花紅始憐
發硎崔御史復見屠刃朱童蒙獄曹鑄語如鑄鐵鎮撫司前日
流血虛傳銓府如意蒙直使楊漣大刀拆君不見大藤一猪獐
將兵兩鉞能成功君不見逆瑾幼自宮雙刃敢挾蒲葵中西廠
內厰誇勢力熱可炙手將毋同巧將一斧蒙天後若較汪劉更

何有大寶誰陳侍史箴太阿已入貂璫手米脂驛卒乘驛行潢
池廿載來弄兵有識預徵熹廟斧行人只說永昌城又陳鴻壽
寄自製瓦壺云茗壺製比龔春好珍重題書遠寄將寒意漸融
如願起晴窗小碾試頭綱二十二郎墨奇絕顧孃子硯又新儲
齋頭乞取成三友柿葉紅時伴著書二十二郎金冬心農也吳
門顧十二孃善製硯住專諸巷

阮文達相國有温州江中孤嶼謁文丞相祠云獨向江中挽倒
流忠臣投死入東甌側身天地成孤注滿目河山寄一舟朱鳥
西臺人盡哭紅羊南海劫初收可憐此嶼無多土曾抵杭州與
汴州筆大如椽足與斯祠不朽

桐城姚石甫瑩以學問經濟表著於時詩有天才格律極細後
湘集中五古浸淫於漢魏晉宋以青蓮爲歸七古開闢動宕出

入李杜近體皆唐音不作中晚語七古有安俊黃一篇淋漓頓挫獨出冠時必傳之作序云上駟有馬名安俊黃者今參知松公爲伊犁將軍時所獻上乘之而良辛未幸灤河親射獲鹿乃賜今名而參知被賞焉公時督兩廣軍瑩經幕中見而榮之作歌紀其事當今天廐龍種誰第一乃有渥洼西來之駿匹本朝寶宇無中外東厭搏桑西月慄戴師大宛自古之名都盡設王官俱天寶伊犁上感房駟精駉耳騅騶爲時出相公昔作將軍時黃雲漠漠揚大旗時平畜產盡韓息何況天山西去水草萬里皆深肥四十萬匹中選得飛黃驕謂此龍種不可以私收貢之天棧出入驂龍跼蹄高踈促三鬣整八尺純黃覆川錦一朝驤首立彤墀天馬如雲皆卻影逐電追風已雄傑步中和鸞獨深穩詔書羽獵赴灤河千乘萬騎從經過射生虎士

三秦少奉轡名王八部多平原蕭條圍已合落日無聲聞蹴踏
綠熊蒼兕窮突奔紫蓋黃旗倏開闔至尊手握青珊瑚草頭
一點黃龍驅左盤右盤龍不如軍中萬歲齊山呼翻身笑指毛
血濡白鹿正中金僕姑倚鞍行賞賞獨下詔謂馴良由此馬
嘉名特賜安俊黃乃是相公前進者相公識馬尤識人必能愛
士如愛身殊方已進萬里足肯令地上留騏驎明當偕羣負骨
入燕市何似壓轅服軛終歲蹴躡於風塵其餘近體五言如亂
雲埋大壑絕壁下孤舟萬山朝立馬獨火夜呼船落日僧呼渡
晴江客祭風七言如日出有聲天柱轉潮來無力海門寬夢回
海上枕椰雨春盡淮南桂樹山弔史忠正云西臺痛哭無皋羽
南國詞人盡子山厓門懷古云人間草木無王土海底魚龍識
帝庭皆有風骨

鮑雙五侍郎桂星歙人一號覺生嘉慶己未進士出李小松少宰門下少宰嘗謂余於會試分房得安徽鮑桂星於鄉試主考得江西吳蘭雪二生才相敵其名字亦絕對真登科記中佳話也雙五詩主格律而自出機軸不蹈故常其讀孟東野集云我爲定詩品五子壓四唐杜李孟韓白泰華恒嵩衡尊東野而躋之李杜是創論亦是獨見其近體佳句如客似菊之逸人如桑者閒消磨今古惟明月漂泊英雄有大江奇雲倒挾諸峰走渴日遙奔大壑來僕本恨人曾作賦客無他好但能詩尋詩竹徑雲雙屨送酒柴門月一肩皆憂憂獨造

舒鐵雲孝廉位字立人大興人誕之夕母沈夢一僧手折桂花從峨眉山來故小字犀禪祖大成官檢討有遺書數萬卷發而讀之十歲卽下筆成章幼隨父翼宦粵西乾隆戊申舉於鄉年

二十四甲寅流寓吾郡桐邑之鄉思橋偶與友人書曰比張融之居建業彼尙多此一舟若相如之返成都我并無其四壁沈青齋觀察見之卽以南花橋老屋借居居十年九上春官不第父歿遂絕意進取奉母以居母固吳人因寓吳凡士大夫開府東南者無雁成羣詩名益噪母歿以哀毀卒時嘉慶乙亥年五十有一所著瓶水齋詩集揚州巴光諧所刊又有皋橋今雨集二卷宋思仁觀察所刊嘗自言人無根柢學問必不能爲詩無真性情卽能爲詩亦必不工陳文述謂乾嘉之際詩人相望歸愚守宗法隨園言性靈君以奇博初獲橫絕一世余所識詩人眾矣必以君爲巨擘焉摘其佳句如屠琴塢大令貽是程堂詩集云一官百里江淮海三絕千秋書畫詩題蔣秋浦侍御詩集云三百里中黃歇浦一千年後白香山落花云末路才人新寡

婦蔡文姬對卓文君皆意新詞警君詩於對偶處尤用意必力
避陳因趙甌北詩以程不識對魏無知工矣而鐵雲則云此時
程不識以下檜無譏對得何等活動

十年士女河邊骨一笑君王鏡裏頭膾炙人口久矣鮑雙五侍
郎詠史諸什亦稱擅場如蘇武云胡地胭脂未妨買古來忠孝
是情真班超云有妹能文真快事生兒繼武亦邊才曹植云七
步五言空敏捷十年三徙太流離陶潛云枕上羲皇嫌夢促尊
前梨棗任兒譁寇準云北征若早嫌孤注南渡何須待百年李
綱云苦爲朝廷惜河北空教都市殺陳東陸秀夫云背上孤兒
趙天子舟中尺地宋山河以上諸聯皆組織自然舒鐵雲亦工
此體如呂仙祠云本來富貴原如夢未有神仙不讀書司馬相
如云識曲佳人真絕代愛才天子況同時陶淵明云五株柳樹

羲皇上一水桃花漢晉前王昭君云尙有牧羊蘇屬國可憐射
虎李將軍書壯悔堂文集云南部烟花歌伎扇東林姓氏黨人
碑諸聯清新超脫視鮑似過之若兩般秋雨盦所摘金谷園云
名士十年無賴賊美人雙淚有情儂等聯刻意求新體格稍卑
非其至詣也

明于忠肅咏石灰云千椎萬鑿出深山火烈俱焚若等閒粉骨
碎身全不顧要留清白在人間近吳江陸朗夫中丞燿咏石炭
云石心特出山一旦附炎熱形狀殊硜硜氣燄已烈烈山中之
人面黧黑艱難致汝骨斷絕餘人盡得籍汝溫不向山中化冰
雪夫石灰石炭等物耳隨詩人之筆爲褒貶而榮辱分焉一潔
一污抱質不同良由自取

朱西峻西湖詩云白塔亂堆歌舞地青山舊繞帝王都歸安葉

筠潭方伯紹本詩云白塔紅亭山水窟黃旗紫蓋帝王都兩聯
工麗相匹

上元包慎伯世臣評

國朝各書家於分篆草書皆推懷甯布

衣鄧石如爲神品第一石如號完白又號頑伯在鄉里好行其
德有鄧善人之目性喜山水且善鐫刻巨筮高屐日攀援於荒
崖古寺閒尋前朝碑版讀之與宣州老儒梅石居最契石居文
穆之孫也家藏金石甚富兼擅園林之勝邀石如居其中繪石
交圖題者甚眾十四洞天山人潘蘭如瑛有懷鄧山人詩云春
雲布濫夜幽草抱寒心念此谷風遠相思江漢深孤蹤渺無際
湘月有遺音歸計如何得天涯老病侵讀此知山人行誼甚高
字以人傳其傳青主之流亞歟

梁恭人德繩號楚生錢塘文莊相國女孫冲泉少司空女而德

清周宗彥兵部配也性耽吟咏自幼隨宦蹤跡半天下且得江山之助著有古春軒詩鈔會稽女史潘素心序之稱其才華兼眾人所有福分爲當世所無集中佳句如晚虹明遠浦高樹噪歸鴉暗水飛星白高梧墜露薄雲漏日明孤塔新水涵秋淡遠天江山勝處詩尤健兒女多時宦亦愁小有亭臺時引月略栽花木亦稱園落葉云立馬祇愁斜照濶聽鶯猶記曉煙深皆非尋常閨閣所能道

梁恭人之女甥汪宜人端字允莊號小韞刑部員外郎汪瑜女聰穎天授七年能詩長適陳雲伯大令子小雲通守小雲天資高縱閨房唱和互相切磋又得君舅之指授詩日益進常病牧齋歸愚明詩選本揚北地而抑青邱持論未允因定爲明人三十家詩選棄取概平人心爲藝林所重自然好學齋詩鈔梁山

舟侍講稱其杼柚文史一洗閨閣纖穠之習而其自負尤在七律如西溪弔厲樊榭墓云湖山清氣重遺編峰繞秦亭有墓田水磨移家姜白石竹西爲客杜樊川填詞花隱歌殘月埋玉茗姬弔暮煙秋雪滿溪梅萬樹招魂誰酌碧沙泉答小雲北上見寄之作云今歲關山瘁僕夫去年春宴共圍鑪燈飄珠箔寒深淺香澹銀屏夢有無疲馬單車愁北地疏梅殘雪憶西湖剡門風雨征衫薄怕聽芳林叫鶉鴝題袁海叟詩集云東海波深明主意北山月冷放臣心題顧亭林詩集云燕趙悲歌騎瘦馬山陵酌酒拜啼鵲

嘉善鍾元甫刺史汪杰以嘉慶丙子丁丑聯捷成進士出宰山右未謁選以前頻年客授人但知其雄於制義而不知刺史固博覽羣書潛心理學不屑屑以詞人鳴也然卽以詩論皆融會

於漢魏三唐不落凡近有小輞川書屋詩集經吳西穀先生清
鵬訂定而序行之今節錄古體一首以見大概守歲云膈膈膊
膊爆竹聲磊磊落落流星明東家西家上夜扇開筵守歲倒醪
醺憶昔年幾十五六羣兒作隊相馳逐歲除一夕然明燭喧嘈
嬉笑無羈束蹉跎歲月纔過目兒子紛紛森立竹眼看此輩已
復然今我感慨二毛年且喜同氣如枝連一杯到手還相傳宵
長更轉城烏起暗數年頭接年尾明朝海日上天東開窗四面
來春風客來打門聲絳綈起迎再拜頻鞠躬堆盤春韭剪青葱
屠蘇酒滴琉璃鍾酩酊留客眼朦朧僮僕怪我顏色紅醉倒夢
入華胥中不知頭髮將成翁

阮文達石渠隨筆云于文襄敏中書華嚴楞嚴經寶塔蓋先畫
成塔形小楷寫經於畫格內凡欄柱簷瓦窗階鈴索皆有字宛

轉依線讀之成文此尙非難所難在每有佛字皆算定寫在欄柱頂及簷際諸尊處不得亂爲填寫此數軸皆文襄初入懋勤殿時奉勅所寫凡排算將二年寫將一年實爲鉅製按吾郡楞嚴寺有石刻董香光寶塔圖鄧尉聖恩寺法堂內向懸經字塔二軸高可丈數尺其一金書四大部經萬曆時古歛李國寧海虞許惠心筆其一墨書華嚴經崇禎時李貞筆惜未詳何地人字如黍米點畫端好見虞虹升遊鄧尉山記而江山縣天甯寺中藏有嘉靖間許德字虞山夫婦同書華嚴經作寶塔圖凡十三層計十兆九萬四十三字字細如蟻閱十三年乃成劉德甫有詩云四千六百有餘日晨窗對試銀鉤筆華嚴樓閣指端成信有人間真願力許家居士神仙孫早歲香燈淨六根生當嘉靖昇平日夫婦同心戴佛恩發願寫經宏聖教蠶頭出手

皆精妙浮圖突兀十三層一層一歲毫尖造木魚聲裡度年華
尖合全無一筆差絕勝函中繙貝葉那同幃上繡蓮花吾聞趙
松雪寫經書最工然出一手耳未與仲姬同又聞彩鸞夫婦皆
登仙一日能書百幅箋要不寫經惟寫韻至今寸絹罕流傳豈
若君家善女人與善男子功德懃修乃如此珠網西天總渺茫
金塗南國徒華侈當日生天自一家如今合璧稱雙美不惹蛛
絲不燕泥旃檀供養儼支提偃同白傅香山集龍象諸天好護
持

劉德甫名佳號眉士江山人以嘉慶戊辰舉人充騰錄館歷官
江蘇知縣所至有政聲眉士工於文好吟咏眉山雄快渭南清
新兼而有之釣魚篷館集中各體皆工其近體如葛嶺云已曾
富貴又神仙師相園亭占地偏鑒古自開多寶閣調羹人笑賣

離船北來大使頭成雪南去連臣骨化烟可惜殘棋拚一着千秋誰誦福華編下第出都云不遇豈忘知己感再來惜異少年時不才似我應高閣平步看人上玉堂亦知蘇轍稟宣少柰有胭脂畫總差多病况經三月別曰歸先慰一家愁荅徐獻謨云老樹停陰留客坐大魚闕浪聽詩來送吳克庵廣文南還云俸薄僅堪沽酒醉身閒仍可借書看留鬚云抗顏人乍尊前輩雍面吾尤戀少年怕觸心情來鏡裡愛從兒女挽燈前由天竺至靈隱云滿山黃葉客聞磬一徑白雲僧賣香東阿道中云馬蹄蹋雪僵無力人面吹沙颯有聲之官留別云一命敢嫌爲吏俗十年悔未讀書多粗知民瘼緣身賤乍入官場畏禮苛德甫工於言情集中有悼往八首悱惻纏綿不減樊榭之哭月上也今錄二首云驪歌催上鹿溪舟不柰蕭郎愛遠游嬾寫蛾

痕來鏡裏慣憑鵲語卜刀頭魂銷徐淑書中字目斷羅敷陌上
樓妬然天孫隔河漢年年長得見牽牛長安春老杏花稀嚼指
倉皇季子歸雙櫬齊心營馬鬣三年滴淚滿牛衣艱難往事思
猶痛文字謀生計總非嫁得黔婁真悞汝鬢邊終歲只蓬飛又
云多愁卿自難長命輕別儂真悔寡恩肯爲長貧將壻慍恰因
最小得姑憐無題二首則納寵之作雖悲歡異趣要皆一往情
深今錄一首云鏡中睂嫵畫中身雙漿迎來茂苑春行記第三
稱小妹月逢十五是圓辰蜀箋小楷書獬獬吳語低鬟聽未真
玉佩定情親解與銀屏迴憶比肩人

登科最早者道光閒侯官林范亭觀察廷禧年十七成進士而
番禺劉樸石先生彬華中式乾隆丙午科舉人年纔十三越十
五年捷南宮爲嘉慶辛酉科年亦止二十八耳官編修釋褐歸

掌教端溪越華書院生平恥干謁固窮勵學海內稱大手筆所
選嶺南羣雅集幾於家有其書自所作詩精益求精不肯輕以
示人故凌揚藻嶺海詩鈔內僅登五首吉光片羽而已門人方
竹孫茂才繩武奉懷詩云揮毫遺窮愁跌宕造妙理檢書累長
夜襟期淡流水數語可想見其丰裁子達號筠卿中道光丙午
科舉人前後遙遙六十年惜先生已逝不及重赴鹿鳴不然真
佳話也筠卿於庚戌年與余同考取國子監學正學錄

我朝開國至今重赴瓊林宴者凡七人蓋非少年釋褐而又享
上壽者不能然賴天全非可倖也吾浙袁子才大令以乾隆戊
午己未鄉會試聯捷年才二十有四卒於嘉慶二年丁巳壽八
十有二僅隔一年鹿鳴瓊林兩宴俱不及與近時吳仲昀制軍
振械以嘉慶癸酉甲戌聯捷成進士而卒於同治十一年壬申

亦僅隔一年兩賢前後全轍何造物之多缺陷耶惟河南夏邑李書年少保乾隆庚子成進士至道光庚子子銘皖又成進士時少保年八十餘前後適遇恩科尤屬僅事相傳少保爲安徽臬司時平反霍邱范二之煮人獄案時年五十餘尙未有子是年卽生銘皖則作善降祥之驗也吳縣相國潘文恭公生於乾隆己丑是年公世父榕皋先生成進士公以癸丑大魁天下後來兩公均重赴瓊林而文恭卽卒於咸豐三年癸丑卻在與宴之後一門之中兩遇曠典得天獨厚洵熙朝佳話也文恭幼擅慧業氣宇不凡年十五應童試邑令李逢春以范文正天下爲任屬對公對以韓昌黎百世之師令大加賞異著有思補齋詩集六卷皆臺閣體裁而雍和之氣自在流出有題石琢堂蒲團習靜圖集宋人句天衣無縫可以摘作楹聯如偶對好山留

客坐每思舊友取書看會以山川爲眼界但收風月屬詩人暫
借蒲團學禪寂想銜杯酒問花期

我朝詩人晚達者姜西溟康熙丁丑進士及第年七十沈歸愚
乾隆己未進士年六十有七此外罕有踰此者若逢 特恩開
科各直省舉人有年屆大耋赴京會試者三場完卷雖未中式
亦必奏請給銜寵飾此異數也道光中有廣東舉人陸雲從年
百有三歲來應會試 恩賜國子監司業銜黃勤敏公贈以詩
曰何肉周妻自得仙醫方不用集甄權中朝我已頽唐甚尙少
先生三十年一時傳爲佳話然亦不敢信者余生平以未得
親見百歲翁爲憾咸豐壬子會試前聞有廣東某孝廉到京年
踰百歲亟往訪之見其精力尙健舉止樸野問以鄉榜則新科
也又問何時入泮亦登科之前一年也此蓋援壽榜之例而取

辨臨時一火鑄成者是否百齡無可援證矣

吳西穀清鵬嘉慶丙子捷鄉關其攀桂仰天高試帖詩有曰萬
花齊入手一鏡正當頭潘星齋曾瑩主試滇南擬作風泉滿清
聽試帖詩有曰萬松空際客一月定中明兩聯格調相似而潘
作尤超

江山劉諫史侃眉士明府之兄也有香雪詩存六卷近體善寫
山邨之景如相林暝翳樹穀雨夜髡茶吟扉侵月掩野步犯霜
歸天截餘霞斷人梯石磴危遠烟圍小屋斜照起秋聲豚柵牢
封石狼聲冷到門剪叢通麝徑留果作猿糧古墟棲晚色紅葉
歛殘陽仙霞關云梯懸驛路人盤樹天截關門馬踏空皆警句
也

德清俞劒花年丈鴻漸余同年壬甫刺史蔭甫太史之尊人也

嘉慶丙子舉人茹貧劬學終歲饑驅未發解時館於我郡者數
年嘗讀白香山贈內詩貧中有等級猶勝嫁黔婁卽倣其體云
擁衾不成寐屈指算今年篋有書眉筆囊無造孽錢飯香新刈
稻衣煖舊裝綿預想梅花底歸來共擘牋其怡然自得之趣溢
於言外舊有印雪軒詩鈔皆自抒胸臆不落曰窠其闡發忠義
事尤多關繫史閣部墓云孤掌難揮落日戈當年開閭涕滂沱
一篇明遠蕪城賦萬古文山正氣歌老輩圓扉期望大指獄中
毅公重臣末路惡顏多公慕洪經略事事效之及公殉節洪深以歸了一著不如爲愧衣冠高
冢梅花嶺何限行人再拜過湧金門施將軍祠云雪窖攀髯恨
尙新胡然北向願稱臣墳頭禾種分屍檜殿上難容壓日秦求
活小朝原不屑列名刺客恐非倫醵錢父老憐忠義社鼓頻敲
約賽神謂武庚不當加以叛名見趙味辛先生詩曾有此論卽

題趙詩後云漫慼鴟鴞毀室頻武庚未可例諸臣遺墟幸席朝
歌舊義舉當先洛邑民縱遜少康能復冀敢同宜曰竟忘親世
儒眼小纔如豆但見周家有聖人又有齊物詩云聚俗人千仍
是獨得知己一便爲多官禮非無禍世事申韓亦是活人書護
持易保琉璃脆銷鑠難憑金石堅丈人自抱忘機甕宰相徒珍
記事珠豈無千里心相印竟有同牀夢各殊虎在檻中誰復畏
蛙居井底亦能尊名言絡繹可作座銘

宋姜白石有印章曰鷹揚渭野鳳儀虞廷蓋隱姜夔二字近番
禹杜洛川學博游仿之自鑄小印曰姓隨工部著名與放翁同
洛川世居羊城南關人稱城南杜工畫善吟詩筆庸峭摘其佳
句如轉覺貧添客何曾病減詩江湖銷夏詩兼酒風雨同船客
半僧皆有逸致

徐錢生觀察榮廣東駐防漢軍道光丙申進士以浙西巡道調福建汀漳龍道未赴留浙防堵轉戰至安徽魚亭陣亡觀察早年工詩負盛名才情橫溢個儻風流晚歲愈趨沉鬱古體如

訓紀云道光歲乙巳秋八月丙辰浙江玉環廳直隸同知臣徐奉召見稽首今聖人垂問年與籍次問所出身次

問玉環地及此環山民臣再稽首對地處溫台濱雍正五年

前棄之於荆榛臣衛臣坦熊墾復招徠勤厥里七百餘廿二都

以分海山各星列巨浸青嶙峒東至日所出實通日本津設餉捕同知訓導巡檢并移樂大磐兵爲水陸兩營爲溫台籬藩而海警以清其民甚愿樸所食皆自耕三時亦計海耕漁以爲生食乃蓄之絲人絲而畜莖帝曰俞嗟哉念我民苦貧汝往教之儉忠孝讓與勤未能使無訟理解平其情翦剔首強暴毋俾

擾我氓念哉萬赤子永以享太平臣再稽首謝 聖訓詳諄諄

皇極錫五福一語窮檐春戢戢玉環山玉環海堽淪山海有

窮極 聖澤垂無垠大書摩之崖道路千秋遵偶作云寒不求

官衣饑不求官哺各自謀其生而謂官父母官乎試自問背汗

得無雨桁楊與刀鋸而忍鞭撻汝何用慰汝勤強教勝休煥大

梁行起云博浪沙擊不死秦始皇朱仙鎮呼不起岳鄂王讀書

萬古兩恨事一日併入愁人腸其他佳句如石嫩難成洞溪驚

不受船秋老水生骨地童山不毛水橫常爭路雲疎不滿林蓼

有驚秋色蟬無送暑心遠樹浮如薺孤城隱似杯林疎鴉補秋

來葉天迴鴈盤水底雲峽束線天危度馬雲扶蘿石闌窺人入

天石瘦多奇骨拔地松高儻異才松花一路吹黃雨石筍連空

擁硬雲歸路四千三百里明年五十六重陽漸近歸程仍旅泊

正思吏隱復時艱皆融會古今不拘一格觀察尤善畫墨梅格
高韻勝有懷古田舍詩鈔可繼宋芷灣

天下害之所伏一擊不勝則橫決潰防靡所底止其勢然也道光
庚子以前吸食鴉片者尙少自島夷構衅厲禁大開迄今流
毒徧天下不可收拾矣是以君子遇積重之勢慎發大難之端
也聞水菸初行之時亦然番禺蔡樹百比部蕙清有水菸詩云
水菸產蘭州其始行近屬繼乃及楚豫流布仍狹促何來好事
者張皇形奏牘謂菸所種植大害於五穀地多一畝菸世少數
石粟若弗加厲禁農田滋短縮百姓失所天歲饑無餽粥庸知
菸所生高燥宜山谷是爲不食地弗能藝麥菽邊吏以上陳商
販免驅逐春雷此一驚凍筍盡抽竹菸遂不脛走數歲徧川陸
上達於朱門下盈於鄙屋菸具過飯餽菸味甚粱肉一發不可

收飛流下高麓方信天生物人盡食而嚮順之氣自平動之機
相觸水菸小焉者更有大流毒奈何諸君子罔念清淨福忍令
吸食微而使兵戎伏此詩殆作於黃澍齋先生上漏卮一疏時
乎然阿芙蓉非水烟比也黃疏言若不及今禁止恐數年後無
可籌之餉無可用之兵乃同治閒卒能翦滅髮匪奮迹中興者
豈其言之不驗哉良由中華地大物博通商以來所入足抵所
漏此有天幸未可謂黃疏言大而無實也昔林文忠負謗獲罪
猶奏辨云天下後世斷無以鴉片煙爲不必禁之理斯言可揭
日月而行矣